

癸

巳

存

稿

癸巳存稿卷之四

彭愈正燮理初

道書經絡

冬至運太陽配足少陰腎君火

子丑平坐伸兩足拳兩手按兩膝左右極力三五度

平坐謂垂足

足坐

小寒運太陽配足太陰脾溼土

子丑正坐一手按足一手上扳挽手互換極力三五度

正坐

跌坐

大寒運厥陰配足太陰脾溼土

子丑兩手反據牀跪一足伸一足互換極力三五度

立春運厥陰配手少陽三焦相火

子丑正坐疊手按髀轉身按

物
髀一

頸左右後引三五度

作
髀

雨水運厥陰配手少陽三焦相火

子丑正坐疊手按脰轉身撓頸左右偏引三五度

驚蟄運厥陰配手陽明大腸燥金

丑寅正坐握固轉頸肘向後掣五六度

春分運少陰配手陽明大腸燥金

丑寅正坐伸手迴頭左右推引六七度

清明運少陰配手太陽小腸寒水

丑寅正坐左右挽引七八度

穀雨運少陰配手太陽小腸寒水

丑寅平坐一臂掩乳一手上拓左右五七度

立夏運少陰配手厥陰心包絡風木

寅卯閉息瞑蹲反握兩手抱掣膝左右五七度

小滿運少陽配手厥陰心包絡風木

寅卯正坐右掌拄案榻左手平上拓左掌如之三五四度

芒種運少陽配手少陰心君火

寅卯立身仰身手上拓五六度定息

夏至運少陽配手少陰心君火

寅卯蹲坐環手屈腳平踏手中左右各五七度

小暑運少陽配手太陰肺溼土

丑寅反手據地屈壓一足直伸一足力掣各三五度

大暑運太陰配手太陰肺溼土

丑寅正坐拳手據地聳肩左右虎視三五度

立秋運太陰配足少陽膽相火

丑寅正坐兩手據地縮體閉息聳身上躡七八度

處暑運太陰配足少陽膽相火

丑寅正坐轉頭左右舉引反手椎背上五七度

秋分運陽明配足陽明胃燥金

丑寅正坐兩手掩耳反側其首三五度

白露運太陰配足陽明胃燥金

丑寅正坐兩手按膝舉頭左右推引三五度

寒露運陽明配足太陽膀胱寒水

丑寅平定坐舒兩手攀兩足各以膝掣之五七度

立冬運陽明配足厥陰肝風木

丑寅正坐左手按膝右手挽左肘拗頭向左右右亦然三五度

小雪運太陽配足厥陰肝風木

丑寅正坐左右拗顧兩手左右按膝互挽三五度

大雪運太陽配足少陰腎君火

子丑起立兩手各左右折兩足各左右踏五七度

右出道書聖賢保脩通鑑其法以時行功以經治病但合其所好亦可偏行之行功訖叩齒吐納咽液其法與易緯通卦驗脈應俱異導引之術通人可自爲之貴合脈氣耳又胎息秘要云肺病瘡及鼻塞但呼泗心病口舌乾但呼呵脾病脹及脣焦但呼呼肝病及目但呼噓腎病及耳但呼吹三焦氣不和但呼嘻今喇嘛爲婆羅門法其按摩見道藏備急千金寶要慈函十一卷中蓋唐以前古法也亦列於左

兩手相捉紐如沈手法

其法共爲十八勢

兩手淺相又翻覆向臂

兩手相捉共按胘胃腕左右同

以手左右如挽五石弓

兩手按胘徐振身左右同

作拳向前築左右同

作拳却頓開臂左右同

如拓弓法左右同

以手反椎背上左右同

據地縮身曲背向上三舉

兩手抱頭宛轉胘上此是抽脅

大坐

跌坐

斜身排山左右同

大坐平舉脚虛掣左右同

據地迴顧

虎視

左右同

立地反拗身三舉

兩手急兩相又左右足踏之

起立以足先後虛踏左右同

大坐伸左腳以手句置右膝中以手按之右同

胎

淮南子精神訓云精神者受於天形體者稟於地背陰而抱陽冲氣以爲和故一月而膏二月而肤三月而胎四月而肌五月而筋六月而骨七月而成八月而動九月而躁十月而生魂魄處其宅精神守其根晉王叔和脈訣九平妊娠胎動血分水分吐下腹痛證云婦人懷胎一月足厥陰二月足少陽三月手心主四月手少陽五月足太陰六月足陽明七月手太陰八月手陽明九月足少陰十月足太陽諸陰陽各養三十日活兒其手少陰太陽不養者下主月水上爲乳汁活

兒養母隋巢元方諸病源候四十一妊娠候云妊娠一月始形足厥陰養之肝主血血流澀而不出二月始膏足少陽養之膽主精精成包裹三月始胎手心主養之形象始化脈中精神內屬於心四月受水精成血脈手少陽養之三焦內屬於府六府順成五月受火精成氣足太陰脾脈養之四支皆成六月受金精成筋足陽明胃脈養之口目皆成七月受木精成骨手太陰肺脈養之皮毛成八月受土精成膚革手陽明大腸脈養之九竅成九月受石精成皮百節備足少陰腎脈養之兒脈續縷皆成十月納天地氣於丹田亦心小腸脈不在列三焦合心包卽心也別石於土者道家之祕推所言

膏肌筋骨與淮南異其實道家初說胎以三月至五月成宋
聖惠方云一月胎如酪二月似果三月有形四月分男女五
月筋骨成六月鬢生七月右動八月左動九月轉身十月生
管子水地篇云人水也男女精氣合而水流形三月而咀五
味五藏酸主脾鹹主肺辛主腎苦主肝甘主心五藏具而生
肉脾生鬲肺生骨腎生腦肝生革心生肉五肉具發爲九竅
脾爲鼻肝爲目腎爲耳心爲口舌肺爲竅五月而成十月而
生故水凝蹇而爲人而九竅五慮生焉此乃其精也蓋旣成
形六月以後皆養之故有六七月生有十四月生者則管子
之言是也其分十脈養十月者元李鵬飛三元養壽書引產

書云一月足厥陰肝養血二月足少陽膽合肝三月手心主
右腎養精四月手少陽三焦合腎五月足太陰脾養肉六月
足陽明胃合脾七月手太陰肺養皮毛八月手陽明大腸合
肺九月足少陰腎養骨十月足太陽膀胱合腎五行相生各
養六十日宋史錢乙傳云孕婦病醫言胎且墮乙曰孕者五
藏傳養率以六旬乃更誠能候其月偏補之何必墮已而子
母皆得全是五陰合五陽其以心主爲腎蓋相火之義然必
指爲右腎亦難經之蔽三焦合腎本黃帝古義也若道與釋
之說則金完顏壽重陽子王詰碑云仙母孕二十四月又十
八日生按二十四氣餘土氣而成真人也其說甚鄙餘十八

日既不宜指數且二十四月乃四十八氣土王十八日卽在二十四月中不得別餘土氣法護譯佛說胞胎經流志譯大寶積經並云父母及子相感業神入胞胎地水火風衆緣和合漸得長成一七日如藕根十七日有短痊風吹令暴卒以堅強之三十六七日不樂住腹三十八七日有風令長伸兩臂轉身向下以向生門依計之在胎止八月半也過此則無所爲不及期又不能全故惟管子之說可通廣志云獠民皆以七月生東醫寶鑑云上陽子言四十九日始胎以後七日一變自二百四十五日至三百八日皆可生天方典禮云眞主造人物成數用四十初造人祖之身調治坏土以四十晨

故四十日成胎四十日成血四十日成肉四十日形象備及其生也四十日覺言笑四十月而離母懷亦以五月形象備蓋必五月始成其後五月皆可生也

面長

荀子非相篇云昔者衛靈公有臣曰公孫呂身長七尺面長三尺而廣三寸呂功績今不能知而荀子稱之曰賢西陽雜俎壺史云道士邢和璞居終南延一客長五尺濶三尺首居其半言上帝弄臣蓋東方朔之流仙官之滑稽者也雲仙雜記云郭汾陽每遷官則面長出三寸五代史亦云桑維翰七尺之身一尺面漢書言陳孟公長頭大鼻後漢書賈逵傳云

問事不休賈長頭方言云燕記曰豐人杼首杼首長首也豐人大人首及面貴長大也周書蕭管傳云宗如周面狹長管戲之曰卿何爲謗經如周曰身不謗經管曰卿不謗餘經當由謗法華耳以法華經曰聞經隨喜面不狹長也按法華隨喜功德品云若復有人語餘人言可共往聽面色不黑亦不狹長亦不窟曲無有一切不可喜相

額黃眉間黃

夷堅志丁集云相工占丁湜科名曰相人先觀天庭須黃明潤澤則吉此相法也韓愈詩云眉間黃色見歸期亦言相好事吉嘗求相法凡女人妝飾皆是好相掠髮取角犀豐盈削

眉取疏長施朱取脣紅墜耳取耳有珠染甲取指潤銀甲取
指尖長塗黃取額明男女有一於此皆是貴徵女人塗黃始
見蕭梁宇文周時南宋卽希見玉臺新詠梁江革詠歌姬云
薄鬢約微黃輕紅淡鉛臉費昶詠照鏡云留心散廣黛輕手
約花黃皇太子倡婦怨情云散誕披紅帔生情新約黃戲贈
麗人云同安鬟裏撥異作額間黃率爾成詠云約黃出意巧
纏絃用法新簡文帝美女篇云約黃能效月裁金巧作星王
詠奉和率爾成詠詩云散黃分黛色熏衣雜棗香陳後主採
蓮曲云薄落點花黃徐陵奉和詠舞云低鬟向綺席舉袂拂
花黃庾信鏡賦云靨上星稀黃中月落舞媚娘云眉心濃黛

直點額上輕黃細安劉緩鏡賦云訝宿粉之猶調笑殘黃之
不正盧照鄰古意云片片行雲著蟬鬢纖纖初月上鴉黃駱
賓王棹歌云寫月塗黃罷淩波拾翠通梁鋌觀美人臥詩云
落釵猶冒鬢微汗欲消黃韋元甫木蘭詩云當窗理雲鬢對
鏡貼花黃吳融曉看妝面詩云眉邊全失翠額畔半留黃李
賀感諷云眼逐春暝醉粉隨淚色黃李商隱宮中曲云賺得
羊車來低扇遮黃子效長吉云君王不可問昨夜約黃歸早
梅有贈云何處拂眉資蝶粉幾時塗額藉蜂黃蝶詩云壽陽
公主嫁時妝八字官眉捧額黃溫庭筠偶題云紅垂果蒂櫻
桃重黃染花叢蝶粉輕一言口一言額也又漢皇迎春詞云

豹尾車前趙飛燕柳風吹散眉間黃又詞云粉心黃蕊花壓
黛梅山兩點他如黃粉楚宮人芳華玉刻麟撲蕊添黃子臉
上金霞細蕊黃無限當山額額黃無限夕陽山黃印額山輕
如塵鴉黃粉白車中出學畫鴉黃半未成唐摭言裴餘慶游
江云滿額鵝黃金縷衣太平廣記抒情詩孫處士柳枝詞云
半額微黃金縷衣崔液蹋歌詞云翡翠貼花黃又蜀牛嶠女
冠子詞云額黃侵膩髮臂釧透紅紗宋陳允平酹江月詞云
暈額黃輕塗腮粉豔周邦彥瑞龍吟詞云侵晨淺約宮黃周
密四字令詞云眉銷睡黃春凝妝淚玉屏水暖微香元張翥
水龍吟詞云沈水全熏縹絲密綴額黃深暈邵亨貞沁園春

詞云有喜先占長頻難效柳葉輕黃今在否黃子常綺羅香
詞云凝素靨香粉添嬌映黛眉淡黃生喜葢花黃者濃淡相
間微黃淡黃者淡抹之散黃者侵鬢約黃者安於額黃子者
星月形又有靨黃西陽雜俎云近代妝當靨如斜月曰黃星
靨李賀御溝水詩云入苑白泱泱宮人映靨黃又有眉黃周
書宣帝紀云婦人黃眉墨妝唐王幹詩云中有一人金作面
宋張芸叟使遼錄云北婦以黃物塗面如金謂之佛妝朱或
萍洲可談述其父師服使北見婦人面塗深黃黑眉紅吻謂
之佛妝孟珙蒙韃備覽云婦女以黃粉塗額元楊允孚灤京
雜詠云淡墨輕黃淺畫眉案佛面色黃法苑珠林云天女用

香采色塗額從所尙也南北朝之末佛教大行故妝用石黃
宋人或有或無南宋遂無之南宋及元人不深考以遼金蒙
韃爲禮異元人徐賁詠妓云蘭膏分鬢綠粉蕊間眉黃明時
據楊慎詞品言汴蜀妓女以金箔飛額上是古黃妝遺法他
處不見今刊初學記劉緩鏡賦殘黃改作殘粧蓋不見其制
因失其義

舌長說

太白陰經雜儀類鑑人篇云吐舌及鼻有壽復貴又藝文類
聚載相書雜要云吐舌及鼻者位至三公案舌長所以壽且
貴者元命包云斗者天之喉舌人舌法斗陽立於三在口中

者三寸象玉衡陰合於四淪入嗑內者四寸象璇璣矣舌長能及鼻者由稟氣盛隘內者能助外故宜壽貴其本七寸亦及鼻而止華嚴經十迴向品云菩薩爾時迴向願一切衆生得覆面舌所言無二皆悉真實佛說寶女經云廣長舌者乃往古世世出言至誠佛本行集經轉妙法輪品云世尊從口出舌至二鼻孔還復以舌舐舌自覆其面已告五仙人若有妄語有如此舌神通力否普曜經云佛出舌覆面上至髮際語婆羅門汝見經書頗有此舌作妄語否佛說梵摩喻經云佛出廣長舌以自覆面左右舐耳縮舌入口五色光繞身三而沒於頂上佛本行集經相師占看品云舌廣長大柔輭紅

薄般若經云如來舌相薄淨廣長能覆面輪至耳髮際宏明
集牟子理惑論亦言佛出舌自覆面蓋舌以長爲貴亦不當
過鼻轉妙法輪品先言至二鼻孔乃爲實相後忽覆面則神
幻之事亦時有之宋史文同傳云崔公度見同於京南明日
再往同曰吾聞人不妄語者舌可過鼻卽吐其舌三疊之如
餅狀引之至眉間崔大驚則同已死神鬼皆能幻不獨佛也
泊宅編云左朝議大夫白同曰佛經凡人三世不妄語者舌
長舒之可及胫予生平不妄語雖未及胫比之常人則已爲
長矣襄陽閒評云佛經言生平不妄語其舌可以及胫後見
黃太史詩曰吾舌猶能及鼻尖恐是佛經之意也其實舌長

相貴不妄語相尤貴未必舌長爲不妄語之報佛舌長兼言
廣至覆兩耳則口不能容以此爲能卽是妄語之證佛本行
集經向菩提樹品云夜叉舌廣大下垂舌廣是夜叉僧徒誤
譯也佛舌長又言薄華嚴經十迴向品云願一切衆生得軟
薄舌恒受美妙清淨上味是又一果報佛本行集經魔怖菩
薩品云魔女偈曰舌薄猶如蓮花葉蓋舌薄能歌唱太平廣
記感應載錄異記云王法朗舌大而長夢老君爲翦其舌亦
以便言也詩言婦有長舌爲厲之階謂舌長多能言貴人褒
姒不賢褒姒未嘗不貴正如佛言胸有卮音萬字蔡京亦有之
容齋三筆以爲疑亦不賢而貴者也

心開

淮南子云聾者學歌無以自樂則心不開言心不開則學不精素問八正神明論云目明心開而志先漢書酷吏傳云王溫舒居廷惛惛不辨至于中尉則心開言得展所長目明志先之謂也後漢書明帝荅東平王詔云心開目朗王常傳云聞陛下卽位河北心開目明白虎通辟雍云其有賢才美質知學者足以開其心異苑云鄭元夢人以刀開其心曰子可學矣論衡藝增篇云觀覽采擇得以開心通意曉解覺悟靈鬼志云聞君奏琴心開神悟晉書虞溥傳云作誥曰然後心開意朗敬業樂羣北齊書吳遵世傳云一老翁謂之曰與君

開心符遵世晚取吞之舊唐書尹知章傳云夢神人以大鑿
開其心北夢瑣言云與汝開心將來必保聰明心開俱言神
王益智

蚤起

素問五藏生成論云人臥血歸于肝肝得血而能視足得血
而能步掌得血而能握指得血而能攝四氣調神大論云夏
三月夜臥早起無厭於日冬三月蚤臥晚起必待日光此無
事業之人養生之說冬日短而蚤臥晚起廢時日矣醫書曰
夜半不寢血不歸肝故古人于夜半之前先言人定是有節
也梁書沈約傳云爲齊文惠太子管書記入直至景斜方出

當時王侯或不得見太子曰吾生平嬾起是卿所悉亦驕盈
衰敗之象宋史周王元儼傳云子允良好酣寢以日爲夜由
是一宮之人皆晝睡夕興薨贈定王有司以其反易晦明證
曰榮易說苑云盛于彼必衰于此長于左必短于右喜夜臥
者不能蚤起抱朴子云臥不及疲不欲起晚不欲多睡然則
臥不及疲此蚤起之法消息之道也六韜云夜臥蚤起妻子
之將也日出而作乃齊家之理宜爾

佛說行嫁年

維阿含經云昔者人壽八萬四千歲人有九種病九病者年
老女人年五百歲爾乃行嫁晉譯佛說彌勒來時經東晉譯

佛說古來時世經姚秦譯彌勒成佛經唐譯彌勒下生成佛經並云佛言當來之世人當長命壽八萬歲女人五百歲乃行嫁耳晉譯舍衛國王夢見十事經無蘭譯國王不犁先泥十夢經並云王夢見十事有小樹生實佛言後世女人年少當行抱子長阿含經云劫轉滅人乃至十歲女生五月皆已行嫁按古人長壽儒亦言之然素問止言百二十歲其言實正王充論衡齊世云如以上世人民侗長佼好堅強老壽下世反此則天地初立始爲人時長皆如防風之君色如宋朝壽如彭祖乎從今千世之後人可長如莢英色如嫫母壽如朝生乎知其時尙無十萬八千歲三萬六千歲之說自張道

陵千古皇甫謐等妄造故實佛徒亦和之宋邵雍於道藏飢聞其說所謂前編外紀儒亦多誣以論衡證之豈得謂之道古之彥乎

女

白虎通云女如也從如人也釋名云女如也青徐州曰嫗嫗忤也始生時人意不喜忤忤然也史記外戚世家褚先生云武帝時天下歌曰生男勿喜生女勿怒太平廣記長恨歌傳云天寶時人歌曰生男勿喜歡生女勿悲酸則忤忤然怒而悲酸人之常矣玉臺新詠傳元苦相篇云苦相身爲女卑陋難再陳男兒當門戶墮地自生神雄心志四海萬里望風塵

生女無欣愛不爲家所珍長大避深室藏頭羞見人垂淚適
他鄉忽如雨絕雲低頭和顏色素齒結朱脣跪拜無復數婢
妾如嚴賓情合同雲漢葵藿仰陽春心乖甚水火百戾集其
身玉顏隨年變丈夫多好新昔爲形與影今爲胡與秦胡秦
時一見一絕踰參辰此諺所謂姑惡千辛夫嫌萬苦者也後
漢書曹世叔妻傳云女憲曰得意一人是謂永畢失意一人
是謂永訖亦貴乎遇人之淑也白居易婦人苦詩云婦人一
喪夫終身守孤子有如林中竹忽被風吹折一折不重生枯
死猶抱節男兒若喪婦能不暫傷情應似門前柳逢春易發
榮風吹一枝折還有一枝生爲君委曲言願君再三聽須知

婦人苦從此莫相輕其言尤藹然莊子天道篇云堯告舜曰
吾不虐無告不廢窮民苦死者嘉孺子而哀婦人此吾所以
用心也書梓材成王謂康叔至於敬寡至於屬婦合由以容
此聖人言也天方典禮引謨罕墨特云妻暨僕民之二弱也
衣之食之勿命以所不能蓋持世之人未有不計及此者

妻

白虎通云妻者齊也與夫齊體郊特性云壹與之齊終身不
改此後起義也按夫者扶也扶起爲陽妻者棲也棲定是陰
昏義云古者天子后三夫人九嬪二十七世婦八十一御妻
曲禮云天子有后有夫人有嬪有世婦有妻有妾又云公侯

有夫人有世婦有妻有妾則妻不爲齊明也儒說御妻爲御妾以就齊義又何以處曲禮妻妾並舉之文妻質稱也自天子至庶人皆得名之

婦人至母家

儒言古婦人嫁後歸寧此外無至父母家者或爲遠嫁異國者言之儀禮士冠禮記云入見姑姊如見母韓詩外傳云子得罪於父母可因姑姊妹謝也新序雜事云可因姑姊叔父謝也姑姊可在家何云婦人不至母家乎葛覃正義引鄭志云大夫妻以下父母旣沒亦歸寧不得用王后諸侯夫人之義

書舊唐書輿服志後

唐人醉公子詞云門外獨見吠疑是蕭郎至刻鵠下香階冤
家今夜醉李後主菩薩蠻云花明月暗籠輕霧今宵好向郎
邊去刻鵠步香階手提金縷鞦蘇軾減字木蘭花云兩足如
霜挽紵衣又云蓮步輕飛秦觀河傳云記那回小曲欄干西
畔鬢雲鬆羅鵠刻李清照點絳脣云見客入來鵠刻金釵溜
和羞走倚門迴首卻把青梅嗅以手提鞦語證之則刻鵠是
大脚不履僅有鵠耳刻如騎刻馬之刻草堂續集詞品俱載
無名氏玉樓春云夜深著繡小鞦兒靠那個屏風立地王沂
孫錦堂秋云早是弓鞦駕小翠鬢蟬輕王觀慶清朝慢云結

伴賜青去好平頭鞵子小雙鴛又云不道吳綾繡韞香泥斜
沁幾行斑以平頭鞵小語證之則小鞵是淺幫窄底方頭與
圓頭高底禮鞵別婦女便履也均爲不裹足之證花間集蜀
毛熙震浣溪沙云碧玉冠輕裏鳳釵捧心無語步香階緩移
弓底繡羅鞵宋鄭文妻孫氏憶秦娥云花深深一鉤羅韞行
花陰所謂鞵弓韞一鉤者如今鞵包底尖向上弓曲故鞵
弓言弓底謂底如弓梢向上韞亦似鉤矣宋時實多裹脚如
蘇軾訴衷情劉過沁園春其纖小可見若此數詞則俱不裹
足也宋史五行志云理宗朝宮人束脚纖直名快上馬則前
此束脚纖而不直可悟弓鞵名義矣今詞人言婦人足牽引

古事用之似是而非也

嚴父母義

慈者父母之道也大學云爲人父止于慈禮運云父慈子孝
謂之人義父子篤家之肥也左傳晏子云父慈子孝禮也父
慈而教子孝而箴禮之善物也而易家人云家人嗃嗃悔厲
吉又云有孚威如終吉象傳云家人嗃嗃未失也威如之吉
反身之謂也彖傳云家人有嚴君焉父母之謂也然則嗃嗃
同憂勤未失慈愛有孚爲慈威如爲子婦之嚴其父母而反
身爲父母之所以嚴嚴父母以子言之也何以明其然也孝
經云孝莫大于嚴父嚴父莫大于配天又云以養父母日嚴

又云祭則致其嚴皆謂子嚴其父母也表記云母親而不尊父尊而不親此漢儒失言於母則違嚴君父母及養父母日嚴之訓於父則違慈孝之誼由誤以古言嚴父爲父自嚴惡不知古人言嚴皆謂敬之易與孝經皆然學記云嚴師爲難師嚴而後道尊亦言弟子敬之書記舜言敬敷五教在寬史記殷本紀及詩商頌正義引書均作敬敷五教五教在寬中庸記孔子言寬柔以教爲君子之強豈有違聖悖經以嚴酷爲師者知嚴師之義則嚴父母之義明而孝慈之道益明矣

陸放翁教子法

放翁寒夜詩云穉子忍寒守蠹簡老夫忘睡畫爐灰新涼夜

坐有作云硯屏突兀蓬婆雪書几青熒蓮勺鐙稚子可憐貪
夜課語渠循舊未須增冬夜讀書示子適云簡斷篇殘字欲
無吾兒不負乃翁書喜小兒輩到行在詩云阿綱學書蚓滿
幅阿繪學語鶯囀木晝窗浣壁誰忍嗔啼啜也復可憐人其
教子之主于寬也如此就其集觀之其子才質宜於寬也與
建子振孫登千峰樹詩云二稚慧堪憐猶賒志學年善和書
尙在他日要人傳浮生詩云橫陳糲飯側朗誦短檠前不用
嘲癡絕兒曹尙可傳感貧詩云翁將貧博健兒以學忘憂夜
坐示子聿云學術非時好文章且自由不嫌秋夜永問事有
長頭喜小兒病起詩云也知笠澤家風在十歲能吟病起詩

示兒詩云讀書習氣埽未盡鐙前簡牘紛朱黃吾兒從旁論
治亂每使老子喜欲狂不欲飲酒竟自醉取書相和聲琅琅
鐙下晚飧示子通云通子挾冊于于來時與老翁相論難但
令歆向竟同歸門前籍湜何憂畔閒居詩云春寒催喚客嘗
酒夜永臥聽兒讀書白髮詩云自憐未廢詩書業父子蓬窗
共一鐙由南堰歸云到家亦既夕青燈耿窗扉且復取書讀
父子窮相依出遊暮歸戲作云莫道歸來却岑寂小兒同守
短鐙檠示子詩云老僊簡編猶自力夜深鐙火漸當謀大門
舊業微如綫賴有吾兒共此憂又云儒林早歲竊虛名白首
何曾負短檠堪嘆一衰今至此夢回聞汝讀書聲縱談詩云

高談對鄰父樸學付癡兒忍窮詩云尙餘書兩屋手校付吾
兒卽事詩云詩成賞音絕自向小兒誇家庭文章之樂非迂
刻者所能曉放翁有示子聿詩云雨暗小窗分夜課雪迷長
鑊共朝飢書歎詩云偶然得肉思共飽吾兒苦讓不忍違兒
飢讀書到雞唱意雖甚壯氣力微苦讀之況如此又短歌示
諸稚云義理開諸孫閑閑待其大賢愚未易知尙冀得一箇
知愛之能勞也南門散策詩云野蔓不知名丹實何纍纍村
童摘不訶吾亦愛吾兒幽居詩云雅意原知足過歸喜遂初
久閒棋格長多病釣徒疏漬藥三升酒支頭一束書兒曹看
翁懶切勿厭蝸廬題齋壁詩云力穡輸公上藏書教子孫追

游屏裘馬宴集止雞豚寒士邀同學單門與議皆定知千載
後猶以陸名村此三詩意思深長君子人言也放翁又有句
云兒孫生我笑趨揖已儒酸然則以陸名村定矣

師道正義

學記云安其學親其師又云禁於未發當其可不陵節而施
相觀而善又云教者長善而救其失又云嚴師爲難荀子致
士云師術有四尊嚴而憚耆艾而信誦說而不陵不犯知微
而論弟子通利則思師呂氏春秋誣徒云反諸人情則得所
以勸學矣又云反己以教則得教之情也所加於人必可行
之於己若此則師徒同體又云草木雞狗牛馬不可以譙詢

遇之譙詢遇之則亦譙詢報人又况達師與道術之言乎此
皆太古所傳師道學記有言夏楚收威者乃官法虞書扑作
教刑在典刑中撻以記之否則威之皆官也易言發蒙擊蒙
者民及寇之蒙昧者也教者則包蒙弟子則童蒙聖人言子
克家吉剛柔接不言刑也其不率教當罰者亦師道所不能
廢後漢書劉祐傳注引謝承書云郡將使子就祐受經五日
一試不滿程限白決罰遂成學業謝夷吾傳注引謝承書云
太守第五倫署夷吾主簿使子從受春秋夷吾待之如師弟
之禮時或嬉戲不肯讀書便白倫行罰遂成其業是業師不
自行罰亦古師道貴重之證楓窗小牘言宋仁宗時開封民

聚童子教之有因夏楚死者爲其父母所訟當抵死此則非人所爲師本以利誠不愛錢卽謝去一二不合意之人亦非大損乃苦守聚徒取錢本意而致出錢幼童於死此其昧良尤不可留於人世也學記云嚴師爲難師嚴而後道尊嚴敬也言敬師爲難師可敬則道尊非謂暴酷舜告司徒敬敷五教在寬孔子言君子之強寬柔以教顏淵歎夫子循循然善誘人是聖人之教其道尊而不嚴酷趙策武靈王謂周紹曰寡人以王子爲子任欲子之厚愛之無所見醜御道之以行義勿令溺苦於學其言可謂至矣今富樂者多輕師貧薄者敬師而師反無良禮云教然後知困荀子宥坐孔子云今學

曾未如脫贅則具然欲爲人師孟子云人之患在好爲人師
已則不知何以教人人皆可以爲堯舜出舍就傅竭財盡禮
師導以醉焉穀梁傳云心志不通師之罪也法言學行云師
者人之模範不模不範爲不少矣蓋師宜學行兼之韓非子
八說云弱子有僻行使之隨師不隨師則陷於刑法言學行
云務學不如務擇師一閔之市必立之平一卷之書必立之
師白虎通云雖有自然之性然必立師傅焉太平御覽載桓
譚新論云諺云三歲學不如一歲擇師是人師經師兼也童
蒙之師字嚴於音文嚴於義程課有常威可畏儀可象是謂
之嚴釋元應一切經音義云諡法溫故知新曰師尊嚴能憚

癸巳存稿

卷四

三

通鑑卷之三百
靈石楊氏栞

曰師清波雜志云或謂童蒙之師不必妙選然先入爲主豈宜闕略是典蒙亦兼人師經師也釋道亦必有師其名分恩義不同者文學師取給於弟子釋道工匠弟子仰教養於師此於禮法必不當混而同之者抱朴子云道教終不以至要者著於紙上故非師不成又云決須好師師不足事亦不能成鳩摩羅什譯持世經云不離法求師但以諸佛爲師曇謨蘭譯佛說梵志額波羅延問種尊經云天下生子養者父母成者師也而八師經云佛自然神曜得道蓋釋迦文佛自染壞色紅衣與第六佛及諸外道師俱異故所從問法者不以師事之

尊師正義

今之言者曰君親師曰天地君親師此皆古有之禮檀弓云
事親有隱而無犯事君有犯而無隱事師無隱無犯國語樂
共子云民生於三事之如一父生之師教之君食之文子符
言云道之爲宗有形者皆生焉其爲親也亦戚矣饗穀食氣
者皆壽其爲君也亦惠矣諸智者學焉其爲師也亦明矣白
虎通封公侯云天有三光日月星地有三形高下平人有三
尊君父師是三者相並禮運云天生時而地生財人其父生
而師教之四者君以正用之大戴禮三本云無天地焉生無
先祖焉出無君師焉治荀子禮論云天地者生之本先祖者

類之本君師者治之本是五者相並也此言人師也荀子致士云弟子通利則思師詩曰無言不讎無德不報此之謂也呂氏春秋尊師云生則謹養死則敬祭此尊師之道也事五穀取魚鼈求鳥獸此尊師之道也視輿馬慎駕御適衣服務輕煖臨飲食必蠲絜善調和務甘肥必恭敬和顏色慎辭令疾趨蹌必嚴肅此所以尊師也此所謂人生於三事之如一七十子從孔子之禮也人師爲然經師亦有之禮祭先師於瞽宗天子至學命有司行事興秩節祭先師焉是傳經之師死則敬祭也漢經師有服晉書隱逸傳云郭瑀師郭荷盡傳其業荷卒瑀曰父生之師成之君爵之而五服之制師不服

重蓋聖人謙也遂服斬衰廬墓三年亦言經師唐書韋表微傳云以學者薄師道不如聲樂賤工能尊其師乃著九經師授譜亦言經師韓愈始以文體迎距之法爲人師而號曰傳道尊師者亦有效朱袁文寶牖閒評言其家延先生敬禮備至遂得成名且相繼科名其爲師能盡職者亦有效朱弁曲洧舊聞云屯留王誥應舉夢胡僧謂之曰君行徒勞耳骨相不應得祿位年五十餘又應舉夢前僧賀之曰君教童子用心篤志不負其父母所託爲有陰德天益君壽而報以祿位是歲果正奏名於馬涓榜下賜第歷官數任以奉議郎致仕年七十七卒於家則教讀者之室鬼神未嘗不臨之也爲師

者可以知所懼矣今與師以財蓋自漢以來所謂資也魏志
邴原傳注引原別傳云原家貧早孤無錢資師師曰我徒相
教不求資也北魏書賈思伯傳云師事北海陰鳳業竟無資
酬之鳳遂留其衣物又清波雜志云張子韶言今教子弟者
以主人所贈厚薄爲教之隆殺則師自失其道喪牖閒評云
袁氏擇從劉先生未嘗三日無餽遺東京夢華錄云市學先
生春社秋社重五重九豫斂諸生錢作會諸生歸時各攜花
籃果實食物社饒而散此固生財之道近人情也

門客正義

晁氏客話云王荆公教元澤讀書求門賓須博學善士老學

庵筆記云秦會之有十客曹冠教其孫讀書曰門客避暑錄話亦有門客語夢梁錄間人一條云訓導童蒙子弟者謂之館客筆記又云人多就聞人德茂求館客德茂自言作門客牙教讀人宋時所以謂之門賓門客館客者其義蓋古者家有塾塾門側屋也人生十年出就外傳居宿於外學書計卽在門塾鄭注檀弓有若夏屋云夏屋今之門廡詩權輿夏屋箋云大具食我不用門廡訓者詩序無爲師意師居門廡也官學亦然明堂之門堂曰塾牆曰序堂門道曰闕有門闕師保之學蔡邕明堂論引魏文侯孝經傳云太學者中學明堂之位也大戴禮保傅篇引學禮曰帝入東學南學西學北

學太學皆在門側此官師弟子之地也其自設教者曲禮云
禮聞來學不聞往教漢書孫寶傳云爲郡吏御史大夫張忠
辟爲屬欲令授子經更爲除舍設儲偕寶自劾去曰君男欲
學義無往教道不可詘後漢書郭憲傳云王莽召王仲子憲
謂仲子曰禮有來學無往教之義包咸傳云太守黃讜署咸
戶曹史召入授其子經咸曰禮有來學而無往教讜遂遣子
師之是古師自立門戶而學徒從之北魏太平眞君五年正
月詔今制王公卿士子息皆詣太學不聽師立學校違者師
身死生人門誅蓋師不立門戶自此始而明史薛瑄傳云泰
州周惠成蘭州恭順侯吳瑾聘爲子師蕙曰召役則可若以

爲師豈可召哉瑾躬送二子於其家始納贄焉蓋來學則學
徒爲門人往教則師爲門客以學在門也呂氏春秋勸學篇
云往教者不化召師者不化自卑者不聽卑師者不聽師操
不化不聽之術而以強教之欲道之行身之尊也不亦遠乎
蓋古者道術書卷皆有傳授惟君學官當往教此外無爲他
人門客者曲禮呂氏春秋皆譏往教蓋未爲太學國學博士
爲師者計而但以詆私家門客又難得佳者顏氏家訓
勉學篇云音詞鄙陋問一言輒酬數百責其指歸或無要會
使汝以此爲師令人氣塞北齊書元文遙傳云文遙子師盧
思道文遙謂思道曰小兒比日微有所知是大弟之力而白

癸巳存稿

卷四

三

靈石楊氏采

擲劇飲甚得師風唐書李忠臣傳云德宗立散騎常侍張涉以贓得罪帝怒不赦涉故侍讀東宮者忠臣曰陛下貴爲天子先生以乏財觸法非過也帝意解免涉歸田里松窗雜錄云張燕公家教授書生通於侍兒擒得姦狀將窮獄于京兆山房隨筆云張倅家繡養娘遞羅帕子與館人劉啟之倅責劉卽日遣出劉作詩自明墨客揮犀云有舉人因許懷德乳母求爲館客曳襦拜于庭下懷德據座受之隱居通議云南豐劉氏前街汪姓因田事建醮館客撰青詞有曰芒芒九土盡入吾疆館客慌忽見一將吏問之曰九土是何等語捫其面目自是頭不正佛本行集經習學技藝品云太子八歲召

毗奢婆密多羅爲師太子將升學堂毗奢婆密多羅遙見太子威德力故不能自禁即使其身忽從座起屈身頂禮於太子足禮拜起已四面顧視生大羞慚據齊僧佑釋迦譜此師爲跋陀羅尼漢言選友也明馬愉馬氏日鈔云京師姚生爲門達館客自刻私印曰錦衣西席此皆門客之不自重者門客又居險地魏志袁渙傳注引魏書云穀熟長呂岐署朱淵爲師友祭酒不受署岐杖殺之渙爲梁相教曰有君之師友有士大夫之師友君置師友之官有罪加於刑焉國之法也所論者邑長且殺師則王侯之師可知漢書言楚王戊爲太子時不好學疾其傅申公戊立爲王乃胥靡申公廣川王去

年十三四時師數諫正稍長則逐其師後又殺其父子晉書
杜錫傳云愍懷太子豎針著錫所常坐璽中北齊書范陽王
紹義傳云擅置內參打殺博士任方榮蓋富貴所行如此其
他强悍者還冤記云晉時孔敞使二子師孔基二子兇很趨
尙不同基屢言之於敞二子殺基周書宇文護傳云母閭在
齊與護書曰吾共汝在受陽時元寶菩提及汝姑兒賀蘭盛
洛並汝身四人同學博士姓成爲人嚴急汝等四人謀欲加
害宋史馬仁瑀傳云十歲時就鄉校輒逃歸旬餘不識一字
博士笞之仁瑀怒夜潛往放火燒學堂博士僅以身免又爲
師儒之官者舊唐書良吏傳云陽嶠爲祭酒薦尹知章范行

恭趙元默等爲學官時學徒廢弛嶠課率經業稍行鞭箠學生相率乘夜于街中毆之上聞令所由杖殺無理者由是始息官師嚴則被毆私家博士多至喪命又或主人暴肆雲溪友議云杜琮爲節度使宏詞李宣古陪琮諸子硯席宣古多侮慢琮使臥於泥中欲辱以檟楚夷堅志云觀察使張淵家居時杖館客馮元起逼令飲糞避暑錄話云章子厚嘗延一太學生在門下元豐末學者正崇虛誕子厚極惡之適至書室見其講易略問其說其人縱以性命荒忽之言爲對子厚大怒曰何敢對吾亂道亟取杖命左右擒擊之其人哀鳴乃得釋亦可危矣古之命師又有異者呂氏春秋壅塞篇云齊

王欲以淳于髡傳太子髡辭王曰子無辭也寡人豈責子之
令太子必如寡人也哉寡人固生而有之也子爲寡人令太
子如堯乎其如舜也魏書穆壽傳云壽謂其子師曰但令吾
兒及我亦足勝人不須苦教之又或學徒自能抵距其師北
齊書彭城王浹傳云博士韓毅教浹書見浹筆迹未工曰今
後宜更用心浹時八歲正色荅曰人論才具何必動誇筆迹
博士當今能者何爲不作三公盧景裕傳云高歡獲之使教
諸子景裕講論精微難者或相詆訶大聲厲色而景裕神彩
儼然卽浹兄弟也其誕謾如此而待門客之禮古又最簡南
史謝靈運傳云時何長瑜在方明處教惠連讀書靈運謂方

明曰長瑜當今仲宣而飴以下客之食尊旣不能禮賢宜以
長瑜還靈運魏書宗室欽傳云欽託高僧壽爲子求師師至
未幾逃去欽以讓高高素滑稽荅曰凡人七日絕粒乃死始
經五朝便爾遁逃去食就信寔有所闕欽乃大慙五代唐
家八傳云秦王從榮傳從容規諷榮戒門者勿爲通月聽一
至府而竟日不召亦不得食趙善璫自警編儉約云汝州趙
守請李若谷爲門客而守尤敬韓億韓至則食設肉李戲簡
韓云久思肉味請君顧訪也夢溪筆談墨客揮犀並云滁州
一先生以學子不行束脩自往詣之學子閉門不接訟於句
當鎮事王向朱史洪皓傳云金陳王悟室使皓教其八子二
年

不給食盛夏衣麤布大雪薪盡以馮矢然火煨麪是古之門客或飴以下客食或食例不給肉或五日不給食或竟日不給食或不與束脩文選注引劉璠梁典云江淹年二十以五經授宋建平王景素待以客禮邵氏聞見前錄云范蜀公爲舉子時在知成都薛簡肅府與子弟講學乘駟至銅壺閣下步行趨府門踰年人不知其爲師也太平廣記載玉溪編事云舊蜀王嘉召一經業孝廉仲庭豫教授諸子以還金火箸事竟以賓介相遇則其初周旋禮節教讀門客本無賓介相遇之法宋人澠水燕談錄云真宗晚坐召學士既退使宣諭適忘御袍帶勿訝學士降謝中人曰上深自愧責有旨放謝

歸田錄則云諸王宮教授入謝祖宗偶不御袍帶至今入謝俟上入內解袍帶後出見之以爲定制教授例與學士諸臣別亦奇例也至宋人則以門客爲下品孫公談圃云藝祖少從陳學究爲學學究時時開諭使容人後從趙學究及踐位而陳居太宗南衙藝祖怒太宗遣之開門館于陳村驛舍而死蓋自上行下效如此門客又自古多無良北齊書樂陵王百年傳云博陵人賈德胄教百年讀書百年嘗作數敕字德胄封以奏武成乃斬百年大唐新語云崔宣家館客姓舒婺州人言行無缺爲宣家服役通于告宣者宣家自擒之金史完顏匡傳云章宗年十餘歲顯宗曰典教幼學須用淳謹者

癸巳存稿

卷四

无

連筠簞叢書
卷四

以匡爲之章宗崩後匡構李妃賈妃死絕章宗嗣夷堅志云
婺州巡檢館客田全璧平江林氏館客黃生皆有小卷揭冊
疏主家陰事及日月爲訐告具能改齋漫錄云開封富民楊
氏家館客與其女通致其女爲尼而死白獼髓云永嘉人鄭
復禮爲知高安孔煒門館賓盜煒女逃事發編徒至正雜記
云戴用少時延一師好爲人作訟牒其父却之乃自匿令家
人誣告用圖其經義害命後迹得之事始白野獲編云萬厯
二十一年閩門宋姓延一餘姚塾師其妻與通遂共謀殺夫
官論塾師大辟而宋氏一門俱滅又云李如松家塾師諸龍
光餘姚人也受李氏恩豢久如松征倭之在高麗者龍光上

急變言如松私與倭和上命訊之無其事乃立枷龍光死儒風埽地盡矣雍正三年四月二十六日宣化鎮總兵許國柱奏二十三日卯刻城門不開緣口北道年裕署中教書之人乘夜逃走徧城尋覓無蹤迹分付今日城門不可早開四年十月十二日

上諭八旗云若果讀書之人何不出仕乃在各處教書爲業使所學果優亦必不能掩也且現在教書之人俱係毫無所能希圖餬口之輩必有借此營謀射利而妄爲者爾等甚宜留心將伊遠之諸事防閑勿爲所欺八年正月十三日

上諭云依人訓蒙授徒者大抵多粗通文理窮困淹蹇之輩

其人既抑鬱無聊時懷憤時嫉俗之意每多幸災樂禍之言而又僞爲剛方正直之概言忠言義以欺庸人之耳目不知者遂誤以爲端人正士而尊信之而暗中受其迷惑者多矣嘉慶十四年六月有戶部郎中劉洋家馬先生訐告主人案刑部訊明定罪枷號刑部大門前一月門客之事如此儒生議論不能一也要之當使自好者心知其意故就經生所未通獮祭類林所未詳者爲之正義

先生釋義

釋名言古者稱師曰先生管子弟子職云先生施教先生乃作先生乃坐先生將食先生已食先生有命先生欲作先生

將息先生已息是也先生者韓詩外傳云古之謂知道者曰先生何也猶言先醒也不問道術之人冥於得失不知禮之所由眊眊乎其猶醉也故世有先醒者有後醒者有不醒者賈子新書先醒云世主恇恇如醉也而賢主昭然先悟譬猶俱醉而獨先醒也是以先生爲先醒意林風俗通云先生當如醒學者譬之如醉言生俱醉獨有醒者是以先生爲醒生也師稱先生見於書者若弟子職又大戴禮五帝德云汝何以爲先生難言之列子黃帝篇云神巫謂列子曰子之先生墨子弟子稱墨子先生孟子弟子樂正子曰先生何爲出此言是也先生亦爲有齒爵者孟子謂宋牼曰先生之志則大

矣趙岐注云學士年長者謂之先生齊策孟嘗君云三先生
高誘注云先生長老先已以生者也曲禮先生鄭康成注云
老人教學者急就章先生顏師古注云先生謂老成之人大
戴禮曾子立事云其少不諷誦其壯不論議其老不教誨亦
可謂無業之人矣荀子臣道篇云者艾而信可以爲師法行
篇云孔子曰老而不教死無思也然則教誨老者之業故曰
先生孔子先覺早歲弟子益進則屈原橘頌云年歲雖少可
師長古人以先醒說先生也師之師曰老師史記云荀卿最
爲老師如仙徒稱郝鑒爲老先生是也同爲師儒則年長者
爲老先生漢書賈誼傳云諸老先生對誼年少言之或又推

老師爲太老先生何氏語林云唐元亨卒門人私謚曰太老先生是也老先生先生或止稱先稱生史記晁錯傳云學刑名於軹張恢先所徐廣曰先卽先生傳又云鄧先注猶曰鄧先生也匈奴傳云其儒先裴駟曰先先生也二文漢書俱作生梅福傳云叔孫先非不忠叔孫通傳云諸生喜曰叔孫生聖人叔孫先叔孫生皆叔孫先生也漢書高帝紀云以魏地萬戶封生注生猶言先生貢禹傳元帝九稱生皆先生賈誼傳云諸生於是以爲能卽諸老先生漢書列傳三十六贊云桓寬曰聞汝南朱生言宋祁曰生上當添先字非矣先生稱先稱生弟子亦稱生後漢書延篤師稱篤延生鄭康成師稱

癸巳存稿

卷四

三

連筠簪叢書
重刊楊氏聚

康成鄭生以博士稱先生故有經業皆曰生受經曰經生入學曰學生在門曰門生漢初九流待詔皆曰先生衛宏漢官儀云博士稱先生以其九流中有學業文帝稱賈誼曰吾久不見賈生武帝謂東方朔曰先生起自賁也史記五帝本紀云薦紳先生漢書路溫舒傳云盛服先生後漢書儒林傳云服儒衣稱先生褚先生續史記自署先生以其官稱之也先生亦父兄稱生徒有弟子名故師同父兄稱莊子讓王篇列子妻稱列子爲先生列女傳黔婁妻稱黔婁爲先生是夫亦同父兄稱以其在家爲長也術士亦稱先生史記蔡澤稱唐舉爲先生淮南人閒訓宋人家有黑牛生白犢以問先生先

生日吉祥也

列子說符篇
先生作孔子

南史吉士瞻傳就江陵卜者王先

生計祿命是也莊子人間世匠石弟子云先生不肖視是工
匠亦稱先生道士則從古以道術稱先生江淮異人錄盜稱
聶尊師亦曰先生又耿先生則女冠也今瞽者曰先生女瞽
則曰女先稱謂繁雜舊唐書職官志太常寺云養德邸園聲
實明著謚曰先生梁元帝金樓子序自署先生曰余於人世
爲不賤矣皇甫謐陶潛王通孟郊胡瑗及程朱稱先生皆表
異之宋史謝絳傳云奏言近世不逞之徒託言術數以先生
處士自名秃巾短褐內結權倖外走州邑此又山人墨客之
依託者與夫猥雜之稱矜張之論皆不足道也

白

冠服有章采惟喪則用白所謂素無章彩也三統尙白自有章采常服亦采緣禮曰白者孝子之有素心也衰用粗麻色近緇緇白與元之間色也元與神交之道也故齋用元梁陸法和知元帝將敗著麤白布衫袴布邪巾周檀特師傳則魏文帝喪周文布帽夫人及兒喪白絹帽絹者古之錫布者言不染則本白色周官保章氏五雲之物注云白則喪疏言此據陰陽書是有天道焉古屋美曰白屋管子輕重丁云表稱貸之家塗白其門高其閭後世則貧家曰白屋貴人有喪則白屋續漢書禮儀志皇帝白布幕素裏漢書翟方進傳云柱

檻皆衣素注云柱屋柱檻軒前闌板丁儀妻寡婦賦云刷朱闕以白堊易元幘以素幘是純用素也宋書明帝紀云帝諱不祥宣陽門民間謂之白門江謚誤犯之上變色曰白汝家門南史周盤龍傳云成買曰若不殺賊便爲賊殺弱息不爲世子便爲孝子孝子則門加素堊世子則門施丹赭胡僧佑傳云僧佑謂其子曰可開朱白二門吾不捷則死吉則由朱凶則由白今則懸布黏紙及席門席棚禮終則去之

收養親戚

宋袁采世範收養親戚當慮後患一條云姑姨姊妹年老子孫不肖者不可不收養恐身故之後不肖子孫妄稱其人因

飢寒而死或稱有遺下囊篋之物須於生前令白之於衆質之於官稱身外無餘物則免他患此必有所監而云然然家庭之事豈能盡以理處者靜齋至正雜記直筆四卷署元闕里外史行素居士著蓋溧陽孔齊作專以示子孫所言家難由婦人愚悍放恣母待子如客女待女之子亦如客母偏縱女女亦偏縱其女母敗其家女又敗其夫家養女終身反恨父母不念女似嫁非嫁似贅非贅又分田少竊公堂資離間骨肉反詡其功家人終日皇皇神不歆其祀其事豈待其子孫不肖者始有他患也又言婦女不可出遊燕聚又言僧道不可入宅院又言江湖術士說客不可使入門皆痛心疾首

之言又論書籍云近事禍福利病可爲誠者以訓子弟勝於說古事亦通言也其言女擾母家顏氏家訓云婦人之性率寵子壻而虐兒婦寵壻則兄弟怨生虐婦則姊妹讒行女之行留皆得罪於其家者母實爲之諺曰落索阿姑餐此其相報也夫婦皆人女女必爲人婦久之卽爲人母自受之又自作之其不悟爲可歎也

君前臣名

君前臣名父前子名當通其意君前臣名者子在君前亦當名其父然是切要指陳不得不名非侃侃而談故抑父以尊君也左傳成十六年欒書將中軍其子欒鍼爲公右公陷於

渚欒書將載公鍼曰書退國有大任焉得專之且侵官冒也失官慢也離局姦也有三罪焉不可犯也鍼侃侃而談可謂喪心病狂書爲逆臣固當有此逆子襄二十一年欒盈出奔辭於周行人曰昔陪臣書輸力王室其子黶不能保任其父之勞大君若棄書之力而思黶之罪臣戮餘也盈述書勞乞憐常態伉直無私定其父之罪而曰黶也黶也則倫常之醜至欒氏而極矣又文十五年宋華耦來盟公宴之辭曰君之先臣督得罪於宋殤公名在諸侯之策臣承其祀豈敢辱君請承命於亞旅耦無故名督而暴其惡亦天地閒戾氣所鍾晉父以求媚於君仁明之主所不受也

夢感

墨莊漫錄云東坡先生知揚州夢在山林間猛虎來噬公方驚怖一紫袍黃冠以袖障公叱虎使去明日有道士投謁曰昨夜不驚畏否公曰鼠子乃敢爾吾本欲杖汝脊豈不知汝夜來術耶道士駭惶而退此知州聰明過人處元史釋老傳云張留孫留待闕下昭睿聖順皇后得疾召留孫祈禱既而後夢有朱衣長髯從甲士導朱輦白獸行草間者卽所祀漢祖天師畫像其事亦見道教碑由禱得之非如揚州道士橫相干也超勇公海蘭察徵時以事赴京感疾甚困夢至德勝門經故太傅明珠第牆外見倚牆有小閣登之有老喇嘛跏

跌坐公憑欄見紅衣少婦哭而來意疑之避喇嘛後少婦拜
喇嘛訖哭而起欲赴公喇嘛以袖障之移時始哭而去公驚
覺汗出疾愈明日在市遇所夢喇嘛屢目公公輒避之公素
信佛此事尤不愧也宋王銍默記言宴臨淄守陳伏暑中思
江南盛冬烘柿李宗易以術致四大食合宴曰此人能如此
甚事不可做自是遂疏之陳振孫書錄解題自言宰南城月
不識白玉蟾謂妖妄之流何可使及吾門近陽湖孫君星衡
不肖供佛言其鄉鄭鄭之禍由其父信仙佛遺禍至酷不與
溫體仁事也

門地

漢書陳涉傳云王侯將相豈有種乎淮南子地形訓云聖人生庶人論衡云鳥無世鳳皇獸無種麒麟此言人貴自立也韓非子亡徵篇云種類不壽亦氣類所感左傳云部婁無松柏唐書來濟傳云護兒兒作相世男兒作匠將相豈有種哉蓋輕薄之詞左傳云明德之後必有達人言世德也晉書王沈傳釋時論云公門有公卿門有卿多士豐於貴族爵命不出閨庭北齊邢劭太尉韓公墓誌云雖將相無種而公卿有門言門蔭子弟也史記孟嘗君列傳云文聞將門必有將相門必有相田叔列傳云趙禹曰吾聞之將門之下必有將類三國志曹植傳北史李彪傳俱引諺曰相門有相將門有將

張端義貴耳集云張浚開建康幕府取幕客命與術者推算皆非貴人浚不樂曰要作國家大事幕下無三五人宰執侍從如何成功此言門下士也

朝奉

徽州人稱朝奉讀書人多笑之按宋史職官志九云朝奉郎員外則朝奉卽員外階夷堅志稱富人爲員外言賜爵不在正員古有賜復有賜爵朝奉者賜爵階也如琉球築登之親雲上從七品築登之正九品築登之座從九品其民人相稱爲某地築登之座亦古員外意徽州多唐宋舊族古言未改朝奉孺人非外間所知方回桐江集有村老呼予老朝奉者

詩是宋時語證

俗稱

論語云四海之內皆兄弟也史記季布傳云季心弟畜灌夫籍福之屬枚乘七發云遠方交遊兄弟後漢書趙壹傳云實望仁兄昭其懸遲魏臧洪傳云洪見紹呼張陳留爲兄

袁紹呼張

邈則府君亦宜爲弟

謂張超

呂布傳注英雄記云布名備爲弟

又引九州春秋云諸將其飲食作弟兄公孫淵傳注漢晉春秋云權謂淵使曰必與弟同休戚又曰司馬懿所向無前深爲弟憂之蜀志關侯傳注引蜀記云徐晃下馬宣令曰得關雲長頭者賞金千金雲長驚謂晃曰大兄是何言也晃曰此

國之事耳呂蒙謂魯肅曰大兄何見事之晚乎又馬騰韓遂
結異姓兄弟晉書載記涼張祚與張重華嬖臣趙長等結爲
異姓兄弟北史元文遙傳云文遙謂子師盧思道曰小兒比
日微有所知是大弟之力朝野僉載云來俊臣謂周興曰有
內狀勘老兄韓愈詩云雲夫老兄有狂氣王季友詩云于公
大笑向予說小弟丹青能爾爲生經云向獵師索鹿肉曰惟
兄施肉令弟得食報以偈曰此人爲善哉謂我以爲兄其詞
如支體便持一膊與白居易詩云每被老元偷格律又云攜
將小蠻去報得老劉來又云時時訪老陳

稱名

婦人謂嫁曰歸趙策云太后嫁女於燕視其母返故古人謂

之歸善頌善禱之義也以母家言之則日出嫁故以其所生

者為外爾雅釋親云母之兄弟為舅又云謂我舅者我謂之

甥姊妹之子當曰外甥也釋親又云男子謂姊妹之子曰出

則經師纂集不足為據左傳陳我周之自出國語姬氏出自

天黿

謂姜氏女

出自自出以母姓言之非甥名也釋親又云妻之

兄弟姊妹之夫二人相謂俱曰甥如此又當相謂為舅耶劉

熙釋名云妻之昆弟曰外甥承謬飾非矣今稱曰舅母之兄

弟曰舅舅

世宗憲皇帝上諭言舅舅隆科多

亦曰舅父

史記齊悼惠王世家

妻之姊

妹曰姨

詩邢侯之姨左傳蔡侯謂息夫人曰吾姨也

母之姊妹曰姨母

史記齊悼惠王世家

癸巳存稿

卷四

三

連筠簪叢書

索舅與姨者夫荅妻之稱婦稱夫之兄弟姊妹曰伯叔曰姑
隱故荅之一曰夫婦之間降就子稱穀梁春秋齊陳乞難言其
妻則曰常之母婦人亦多言兒父也

女人稱謂貴重

房山石經山雲居寺有遼清寧四年鐫經記碑稱刺史子婦
司徒娘子耶律氏女小娘子三寶奴京城憫忠寺遼石函字
有云玉錢一韓家小娘子施蓋娘子以稱內主其閨女則稱
小娘子也金史海陵以第二娘子大氏爲貴妃第三娘子蕭
氏爲昭容丙子平宋錄云至元十三年正月甲申丞相至皋
亭山丞相娘子來到丞相曰你吃一盞酒大事未了你回去

者娘子回程蓋初譯時以娘子爲一家尊稱六朝唐人相沿
遼金元皆承用之或笑其俚不知其託意至高也宋曾慥高
齋漫錄云王安石在金陵貽老姥病牀藥老姥酬以麻線一
縷曰相公好將歸人事相婆也安石好受之婆因公生義如
言周公周姥又公婆公姥對娘子耶君對乾州唐乾陵有石
刻金皇弟都統經略耶君行記耶君是奴稱主知娘子亦奴
稱主也

姬姨

姬者美女之稱漢書文帝紀注師古說最通蓋自周時人皆
以王姬爲貴女子美者稱姬猶男子賢者稱君子矣君子之

義家語云是成其親爲君禮則云君子之子或王肅及見佳本未可非也君子不必是君之子姬何必定姬姓乎如淳曰姬音怡蓋古音或曰今姨娘是姬娘此卻不然母之姊妹曰從母今日姨貴妾呼姨若以爲主母之姊妹也者卽古之娣媵又以明女君不妒忌其意美矣

大人

燕策云雖大男子裁如嬰兒賈子新書云胡大人難親也若上於胡嬰兒及貴人子加之惠大人對嬰兒之稱也召誥云有王雖小植弓云公輸若方小小對大之稱潛夫論考績云大人不考功則子孫惰大學章句云大學者大人之學也寶

隔聞評云前古大人無不守歲者今小兒亦不復講、

出夫

說苑云太公望故老婦之出夫也按娶妻故有出婦贅壻則有出夫太公汲人避紂於東海爲贅壻又被出耳古人稱名必其義委曲可通出兼男女卽寡與獨亦兼男女惟女不稱鰥嫌夜思人道也左傳齊崔杼生成及彊而寡注云偏喪曰寡則兼男女也詩鴻雁傳云偏喪曰寡本是達詁正義云偏喪之寡婦則望文爲訓後漢書劉翊傳云贅獨則助營妻娶注云無夫曰獨按此傳文獨當屬男管子云所謂合獨者凡國都皆有掌媒丈夫無妻曰鰥婦人無夫曰寡取鰥寡而和

合之予之田宅而室家之三年然後事之此之謂合獨則獨亦兼男女矣

嫺母

嫺母見宋書何承天傳北齊書恩倖傳云陸令萱鞠養後主後主謂之阿嫺阿嫺之稱又爲尊矣非乳母之名也釋藏賴字函隋譯善思童子經有嫺母宋敏求唐大詔令二十五有贈嫺婆元氏潁川郡太夫人制

諱法舊事

諱自周有之南朝有觸者必流涕而起唐律名例三疏議云假父祖名常不得任太常官名卿不得任卿職選司惟責三

代官名不得犯名冒榮若犯高祖名者非職制中疏議云父祖名衛不得於諸衛任官名安不得任長安縣職名軍不得作將軍名卿不得居卿任蓋家諱惟責本身非通行於人唐語林云唐人諱及偏旁李衛公諱吉不受周衡謁衡詰以賈山家不言出謝石家不立碑又連載一條衛公語王起云姚顗不可在去流內則不受周謁非爲偏旁周說誣矣五代史唐明宗紀云天成三年二月癸未貶工部尙書盧文紀時除于鄴爲工部郎中文紀家諱業舊例僚屬名與長官諱同或改其任而中書未議改文紀自請連假鄴就位差延州文紀言候鄴還終請換曹鄴自經死故文紀貶亦偏旁事也宋王

栲燕翼貽謀錄云雍熙二年六月辛丑詔內外臣僚三代名諱止可行於己州縣長吏不得出家諱其官稱犯高曾祖父諱者不得冒居而張端義貴耳集云趙文仲在楚州有趙倡新至文仲問其何來荅言因求一椀飯方到此文仲怒其及已名又及其父名立斬之蓋趙方兒趙范也趙家聞家諱必哭蓋是作僞金史白華傳云字述魯久住入宋謁趙范更姓名范用吉范怒其觸諱易其姓曰花其惡豈足倡乎惟顏氏家訓記一條云揚都一士人諱審而沈氏人不書姓又有諱友諱同諱清諱和一座百犯子姓辛苦無聊蕭管傳宗如周有一條云有人訴事於如周疑爲汝州官稱爲汝州如周怒

曰爾敢呼我名其人曰祇言官作汝州不知官名如周早知
官名如周則不敢喚作汝州南史記一事云王攸子亮爲晉
陵太守晉陵令沈嘖之犯亮諱亮啟代之嘖之造坐言曰未
知明府諱若攸若無骹尊旁犬猷若犬旁無骹尊猶若有心
悠若無心攸乞告示亮下牀跳走周密齊東野語記一事云
宣和中徐申知常州一邑宰言前有三狀申府未報申怒責
之邑宰曰今申府不報當申監司申戶部申臺申省申來申
去直待申報方休言畢長揖退此可舒憤懣者也